

# Gerakan bersepadu lahirkan masyarakat berilmu, maju

Um- 22/2/2007

KUALA LUMPUR 21 Feb. — Datuk Seri Najib Tun Razak berkata, kerajaan, golongan pendidik dan masyarakat perlu bergerak secara bersepadu untuk melahirkan masyarakat yang berilmu dan mencapai negara maju.

Timbalan Perdana Menteri berkata, selain peranan kerajaan dan golongan pendidik serta ibu bapa, masyarakat juga perlu bersifat prihatin dengan menyumbang kepada dana dan tabung bagi tujuan pendidikan.

"Inilah tiga penjurua yang saya sifatkan sebagai rantaian yang amat penting.

"Jika kita dapat tentukan ketiga-tiganya bergerak secara bersepadu, saya yakin dalam perjalanan negara pada 50 tahun akan datang dan lebih dari itu, impian kita tidak akan hanya tinggal impian," katanya.

Beliau berkata demikian semasa berucap pada Majlis Makan Malam dan Pelancaran Tabung Pendidikan UMNO Bahagian Lembah Pantai di Pusat Dagangan Dunia Putra (PWTC) di sini malam ini.

Turut hadir, Menteri Wilayah Persekutuan selaku Pengerusi Badan Perhubungan UMNO Wilayah Persekutuan, Datuk Zulhasnan Rafique; Menteri Pembangunan Wanita, Keluarga dan Masyarakat, Datuk Seri Shahriyat Abdul Jalil dan Pemang-

ku Ketua UMNO bahagian tersebut, Yusri Ahmad.

Tabung yang dilancarkan itu akan bertindak sebagai badan mengurus kebijakan para pelajar kurang berkemampuan di kawasan Parlimen Lembah Pantai.

Tabung itu antara lain akan mewujudkan biasiswa kecil bagi pelajar dari keluarga kurang berkemampuan tanpa mengira agama, bangsa dan keturunan.

Sehingga kini tabung itu telah meraih sumbangan sebanyak RM150,000 daripada 36 syarikat korporat serta individu.

## Peka

Najib yang juga Timbalan Presiden UMNO berkata, parti itu perlu menjadi parti yang amat peka dan sensitif kepada keperluan pendidikan masyarakat dan pemberian peluang yang sewajarnya.

"Ia merupakan salah satu kaedah untuk kita dekat kepada hati rakyat dan dilihat sebagai parti yang prihatin kepada masalah rakyat.

"Jika kita membantu mereka yang memerlukan bantuan pendidikan, kita akan dapat memberikan dorongan yang lebih besar kepada anak-anak kita untuk mencapai kejayaan yang lebih besar dalam bidang pendidikan," ujarnya.